

IN ACADEMIAE

Almi Regalis Collegii Theologorum Neapolitani
ortum

O R A T I O

CAROLO BORBONIO

UTRIUSQUE SICILIAE REGI

A

CAJETANO CONFALONE


Congregationis Montis Oliveti Abbate privilegiato,
Dioeceseos Neapolis Examinatore, Excellen-
tissimae ejusdem Urbis Theologo, ac
praefati Collegii Vicemagno Cancellario
dicata.



NEAPOLI MDCCLII.

Apud Joannem de Simone Almi regalis Collegii
Theologorum Typographum

SUPERIORUM PERMISSU.



CAROLO BORBONIO

SERENISSIMO UTRIUSQUE SICILIAE

REGI

BONARUM ARTIUM,

LITERARUMQUE OMNIUM

IN NEAPOLITANO REGNO REDUCTORI,

ET REFORMATORI

LITERATORUM PATRONO GENEROSISSIMO

CAJETANUS CONFALONE

ORATIONEM PRO ACADEMIAE

ALMI REGALIS COLLEGII NEAPOLITANI

ORTU HABITAM

PERPETUUM GRATI ANIMI TESTEM

D. D. D.



Uamquam, SERENISSIME
REX, multis obaeratum
nominibus me Abellinatum
Principi, Magno Regni Can-
cellario, profitear; id tamen
potissimum est, cur eidem
gratias habeam immortales, quod ad vices
suas subeundas adlectus, viam veluti stra-
verit,

verit, qua tuis advolvi pedibus auspicato
liceret; mibique omnibus naturae, artifi-
que praesidiis destituto, ad tam singularis
gloriae fastigium pateret accessus. Fruar
igitur tam excellenti fortunae beneficio; nec
praeclaram adeo nanciscendi patrocinii tui
occasionem oscitanter e manibus labi sinam.
Multa fuere profecto, quae me sub initium
ab hoc aditu laudis non removerent modo,
sed absterrent omnino; cum viderem obse-
quentis animi mei reverentiam tantae am-
plitudini parem asferre non posse. Audaciae
notam verebar, quod mei pene immemor,
paucis hisce pagellis tuum voluerim in con-
spectum venire, oculosque laceessere. Sed me-
tum omnem, quem ipsa nominis tui Ma-
jestas incussit, e vestigio deterisit penitus;
atque adeo praesidentem fecit eximia illa
humanitas, qua Collegium Theologorum per
Regiam S. Clarae Aulam sarcendum, in-
staurandumque suscepisti. Ex eo quippe ad
bene de me ipso sperandum, signum ali-
quod sustulisse visus es. Nec mihi persua-
dere poteram, me cum illo bonorum socie-
tate non iri conjunctum, quicum artissimo
societatis nexu conjungerer. Patere igitur,

hex

Rex invictissime , impolitam banc orationem , Collegii faciem referentem , nomine tuo tegendam , a me tibi sisti ; ac veluti specimen jam restituti Collegii accipere ne dedigneris . Ea quippe , ea est indoles ingenii tui , ut nativis quibusdam igniculis ad litterarum tutelam feraris . Non aliunde accersitus , ingenuus tibi liberalium disciplinarum amor , cum sanguine a majoribus tuis accepisti . Et sane nisi inconcussa Annalium fides , tot tantisque Scriptoribus perpetuo firmata , ab Carolo inter Caesares Magno (per quem bonae artes diu consepultae , tandem aliquando revixere) Te originem tuam repetere luculentissime comprobaret : idem ipse , posthabito veterum suffragio , per te dilucide evinceret . Heredem tanti Principis ostenderet Studiorum Universitas in hac principe Regni Urbe ex integro veluti restituta , ac regia bibliotheca donata . Ostenderet Gymnasium publicum Petiliae regia munificentia excitatum pro illorum commodo populorum , queis ad banc Urbem difficilis patebat accessus . Et si cetera deessent , ostenderet denique Collegium hoc nostrum theologicum diu tenebris obsitum , a Sa-

cra

cra Majestate tua pristino nitore reductum, adque tantam per te existimationem deventum, ut cum Germanicis, Gallicis, Hispanicis, ceterisque demum Europae insignioribus Academiis jam de dignitate certare videatur. Haec quippe ita praeclara sunt, ut eorum decus nulla unquam obscuratura sit aetas. Reliquas igitur praeclarissimas tuas res cum domi, tum foris gestas recensere praetermittens, Deum Opt. Max., ut diu Sacram Majestatem Tuam cum Serenissima Coniuge, ac Sobole ad populorum tuorum felicitatem incolumem, florentemque praestet, obtestabor. Ad tuos tandem pedes provolutus, & fidens tum benevolentiae erga Collegium hoc nostrum, cui Clarissimi Praedecessores tui tot jura contulere, tum humanitati tuae, quae inter ceteras tuas virtutes eminent, Te rogo, atque obsecro, ut publicum hoc obsequii mei pignus aequo, libentique animo excipias. Quod si fuero consequutus, erit profecto, cur ego de me magnifice sentiam, & mei Collegae omnes in hoc tametsi levi monumento clarissimam nominis tui gloriam, animique magnitudinem admirentur, & praedicent.

CRA-

O R A T I O.



Uod prae ceteris hic adfidentibus praestantissimis viris de Sacra Doctrina optime meritjs, hujus Academiae natalem diem celebrandi munus unus Ego adsumserim; haud temere, Patres ornatissimi, Auditoresque Optimi, sive dicendi materiam, sive temporis opportunitatem, vel lectissimorum hominum frequentiam expenditis, a me factum existimare velitis. Etenim quamvis singula ista hominibus ad dicendum accedentibus timorem non levem facere consueverunt, mihi tamen laetitiam aequae, animumque vel cessantem, vel nolentem ad dicendum impulere. Dicturus enim eram de Theologiae Academia, cui instituendae non parum industriae, studii, ac laboris tenuitas mea, ope D. Germani Juliani almi regalis Collegii Magistri adjuta, contulerat. Facturus insimul verba de Theologorum Collegio, Regum munificentia excitato, & ab inclyto Serenissimo Rege Nostro CAROLO BORBONIO, quem Deus nobis seros in annos sospitem servet, prisco, unde majorum nostrorum desidia deciderat, splendori restituto, novoque insuper nitore adaucto, cujus regimen Abellinatum Principis Magni Regni Cancellarii nomine impraesentiarum immeritus gero. His accedit vehemens amor, & ardor, quo ad honorem, & decus huic Collegio, quod inglorium, & inerti situ squalidum diu jacuit, comparandum incensus, feror. His animo sese obversantibus, tantum absuit, ut dicendi onus detrectarem, quin mihi votis omnibus expetendum, & libenti, accensoque animo adripiendum censuerim. Qui mecum
ita

ita sentiet, nullius certe temeritatis, quod unus ego in hunc lectissimum illustrium virorum confessum ad dicendum surrexerim, me redarguet, sed obsequentis, accensique animi mei votis humaniter ignoscet. Hac ego cogitatione erectus, & confirmatus, stadium hoc litterarium ingredi non dubitavi. Etenim si quid est in tanta honoris amplitudine jucunditatis, ut certe debet esse plurimum, ejus ego fructum, non nisi facto virum mearum periculo, percipere me posse spero. Age igitur, ad ea, quae jam animo destinavi, adgredior. Et quoniam in nullo commodius argumento orationem meam versari posse censeo, quam in hujus illustris Academiae, quam sub faustissimis Regis Nostri CAROLI BORBONII auspiciis natam gloriamur, vel indole, vel munere exponendo: illud potissimum exponendum arbitror, quae ejusdem sint munera. His summatim delibatis, quae litterarum a primis earum in Europa incunabulis ad hoc usque Collegium nostrum Theologicum fuerint fata, enarrabo. Mox quid Theologiae praestet Academia, quae hujus curae, qui usus, & quanta demum in illa excitata Auctorum sit gloria.

Intelligitis, Rewerendissimi PP., Auditores Ornatissimi, haec Orationis capita invitationis loco esse ad conventus nostros; neque hic agi, ut expleantur desideria vestra, sed ut accendantur; neque ut extinguatur sitis, sed ut excitetur: neque huic explendae parti, sermone opus est prolixo, aut arte oratoria elaborato. Quamobrem non breviter modo, sed & simpliciter de omnibus, quae proposui, me dicturum pollicor. Utar licentia, quam dudum sibi adrogarunt Philosophi: siquidem illi legibus eloquentiae, quas jamdudum deseruisse ajunt, soluti, veniam certe consequuntur, si rerum potius momentis Auditorem abripiant, quam si demulceant verborum lenimentis. Pietium scilicet sermonis facit artis absentia, quando ornari res ipsa negat, contenta doceri.

Por-

Porro ut rem altius repetam, ipsamque Academicarum nascentium originem in lucem educam, operae pretium facturus arbitror, si breviter de Aegyptiorum, Chaldaeorum, Persarum, Graecorumque litteris initio quaedam delibemus. Aegyptios itaque quod attinet, sapientiae, subtiliorisque doctrinae curam solis Sacerdotibus eorum fuisse cordi compertum est. Cum enim Philosophiae studia, cumprimis ejus, quae in contemplatione sita est, otium postulent liberale, nullis nisi Sacerdotibus permittebantur, quae onerum immunitates, largique redditus, honores, otiumque, Diodoro Siculo fatente (1) redundabant. Quid igitur mirum, si omnigenae doctrinae professores hosce in sacro ordine extitisse Eusebius (2), & Clemens Alexandrinus (3) observarint; ipsa nec abnuente Scriptura, in qua Moysen legimus, omni Aegyptiorum doctrina fuisse imbutum?

Quae vero Aegyptiarum scholarum instituta, eadem fuisse pene Chaldaicarum, Persicarumque, concordit testantur ore Diodorus Siculus (4), & Strabo (5). Ad Graecas potius gentes, quae prae aliis litterarum gloria videntur floruisse, trajicienda est Oratio. His enim, ut magnam partem eruditionis nostrae, sic etiam nomen hoc Academiae debemus acceptum (6).

B

Sunt

- (1) Lib. 1. cap. 27.
- (2) Lib. 9. de Praepar. Evang.
- (3) Lib. 6. Strom.
- (4) Lib. 7. Biblioth. cap. 29.
- (5) Lib. 17. Geogr.

(6) Tenendum igitur *Academiam* initio nonnisi locum unum Atheniensium Suburbiorum gymnasiis instructorum audivisse. Fuerunt nempe Athenis olim praeter alia suburbana tria cumprimis splendore aedificiorum, & gymnasiis celebria: *Academia*, *Lyceum*, & *Cynosarges*. Quorum posteriora duo praecclare persecutus est *Meursius* lib. 2. *Athenarum Atticarum* cap. 2. Quoniam vero Platoni in *Academia* isthac schola philosophiae publica fuit concessa, & quidem omnium prima; hinc scholae philosophicae nomine quam maxime *Academia* illa Attica inclaruit. *Academia* quoque omnis plane Platonis schola dicta est, & qui eam doctrinam amplectebantur *Academici*; qui cum sententiis disenserint, nata hinc nomina *Academiae Veteris*, *Mediae*, & *Novae*. A quibus cum plurimum alii abi-

Sunt enim anni fere bismille , & ducenti , quibus ad Graecos utilium litterarum studia pervenerunt , magnifico quidem nomine , sed tenuibus initiis , ambiguisque progressibus . Erant pauci quidam (adscitis enim , quos favor , & adulatio evexit , Tyrannis , numerus non ultra septenarium excurrit) erant , inquam , pauci inter claudos , vel labantes erecti , quos sophos appellare coeperunt , quosque si penitus perspicias , modestiori hodie philosophorum nomine vix induas . Mirum profecto emicuit in illis ingenium , sed tenebris oblitum in plurimis hebescebat : vera , quae falsis confuse admixta emergebant , dies melior secrevit , & luce sua perfudit . Talia fere sunt rerum omnium principia , cum privatis auspiciis difficilia adgredi contigerit . Nulla enim tunc temporis auctoritas publica scientiis patrocinata . Nullae conantium societates , communi agentes consilio . Prout unumquemque aut ingenitus ardor , aut oblatum alterius exemplum , aut fortunae ludentis opera ad meditanda sive Coeli portenta , sive naturae arcana , sive morum indolem impulit : ita suum illis studium addixit , laboriosius illud , & minus foecundum , quod primi nullis uti ducibus possent ; secundi primis uterentur , nondum , uti par erat , viarum gnaris .

Cogitate homines aliquot exterarum rerum cognoscendarum desiderio accensos , dare se in viam , & quaerere iter per dumeta , nullis antea hominum vestigiis signata ; quaerere autem singulos non communicato cum reliquis consilio ; quaerere suis auspiciis , nulla adjutos

autho-

abirent circa seculi Christiani secundi , & tertii confinia , extinctum sensim est ipsum Academicorum nomen , & invaluit Platoniorum appellatio , quemadmodum recte scribit S. Aug. lib. viii. de Civ. Dei cap. 12. Ceterum primo omnium in Italia Romae videtur illa vox reducta in usum Paulo II. Pontifice : idque non ut olim , de specie scholae philosophicae , aut schola ipsa , sed de Collegio aliquo isthoc tempore Romae commorantium , & priscae doctrinae collapsae restitutionem aliquam instituentium : eoque deinceps in Italia passim id genus Academiae institutae , & nunc etiam in frequente sunt usu .

authoritate publica . Ex his jam animo percipitis , Auditores , quem illi eventum destinationis suae habituri essent , qui scientiarum regiones , nullo antea tritas pede ingredi , & lustrare sustinuerunt . Mirum illos non plane tota aberrasse via ! Testantur autem emicantes passim radii veritatum , non omnem illorum conatibus successum defuisse . Atque ut eximii nihil fecissent primi illi cum Thalete Milesio , nisi quod indicassent , & jam signata reliquissent posteris vestigia , exantlati certe laboris gloriam primam , uberrimamque meruissent . Pervenias enim a Thaletis anno quinquagesimo nono , quo sophi titulum Oraculi occasione acceperat , primo statim seculo ad Pythagoram in Italia , ad Anaxagoram Athenis docentem ; secundo ad Socratem , Democritumque , & Platonem ; tertio ad Aristotelem . Atque hi non jam se intra scientias continere suas vel voluerunt , vel potuerunt ; maluerunt inter plures diffundere , quae sibi detexisse visi sunt , admissuri , aliquando etiam quaesituri auditores , quos sua docerent studia , & sententias .

Quum res ita se haberet litterae faciliores adcessu esse coeperunt . Hinc multa in litterarum cultores redundavit commoditas , redundassetque etiam utilitas in rem omnem publicam , nisi dissidia intercessissent , & rixae philosophantium . Quos profectus sperare non licuisset , si Porticus , & Academia , Lyceum , & Horti consensissent ad investigandam communi consilio , tradendamque communi opera veritatem ? Si certa ab incertis , a falsis vera , utilia a superfluis apte , & concorditer distinxissent , convertissentque studium suum ad optima ? Si non eminere singuli supra omnes , sed junctim universi ad altiora adspirare maluissent ? Id quando male consulti neglexerunt , laudem quidem in eo merentur , quod acroateria aperuerunt , & in instituendis aliis operam infuserunt . Ast in illo dedecus incurrunt , quod gloriae magis , quam veritati studentes , quibuscumque poterant artibus sectam augere , & evehere suam , de-

trahere ceteris connixi sunt . Quo factum est , inquit clarissimus Conringius , *illarum philosophicarum scholarum varietatem in detrimentum potius Reipublicae natam fuisse , quam in emolumentum doctrinae* (1) .

Neque solum haec labes Graeciam invasit : quantum privatis tantum auspiciis cultae sunt inter Italos litterae , aut Pythagoram Magistrum sequuti sunt philosophantes , aut ex Graecis unum , vel plures : Eclecticis enim si qui videri voluerunt , compilatione potius ex diversis antecedentium dictatis titulum quaesivere illum , quam ingenua in veritatem per se se eruendam inquisitione meruerunt . At ista promiscua quidvis sentiendi , ac docendi licentia desit , actutum Christiana Religio omnibus sectis illis contritis , unice super omnes venerabilis effulsit .

Verum enim vero haud diffitendum , ipsammet Christi Religionem , quoad mores , doctrinaeque capita vel ab Apostolorum aetate varias indies persecutiones subisse . Hinc haereses eam invadentes ; inde supplicia undique ad Christianos perdendos conquista . At ne quicquam valentibus cum Imperatorum armis , tum Philosophorum argutiis , mire Christiana Religio invaluit , ac longe , lateque propagata . Ecquis vel leviter historiam sacram ad seculum usque decimum quintum perlustraverit , qui & Gnosticos , Novatianos , Arianos , Nestorianos , Eutichianos , Monothelitas , Iconoclastas , Photianos , Waldenses , atque sexcentis aliis missis , veterum omnium haeresum sutores Orthodoxam fidem impetiisse ignoret ? Tantum vero abest , ut eam tot fulmina , tonitruaque perdiderint , quin potius indies creverit , altiusque radices egerit , Oecumenicis habitis ubique gentium , ac locorum , ad virus extinguendum , Conciliis , quae hucusque temporis orientalia inter atque occidentalia octodecim numerantur : Erectis quoque plu-

(1) De antiquit. Academ. Dissert. 1. §. XXI. pag. 18.

pluribus in locis sacrorum studiorum gymnasiis , Alexandriae praesertim , Berythi , Nisibi , Byzantii , Antiochiae , Laodiceae , Carthagine , Romae , quae Christi milites erudiendos susciperent , alerentque ; quorum testes locupletissimos Hieronymum , & Eusebium habemus (1) .

Post Constantini Magni tempora dolendum nobis maxime est , remissius culta fuisse litterarum studia : immo

(1) De scholis Theologicis tam orientalibus , quam occidentalibus , diserte , ac copiose scripsit clariss. Aulsius libro italice concinnato , cui titulus : *Delle Scuole Sacre* .

Juvas interim nonnihil hic obiter de Theologiae fortuna ab Apostolorum aetate ad haec usque tempora degustare . Sacra quidem erudimur historia , Apostolos doctrinam ex ore Christi libatam , philosophicis tritis vacuum , nativa simplicitate conditam populis tradidisse . Vultus fidelium ut erudirent SS. PP. Apostolorum exempla , & institutionem sequuti , ab iis tradendis abstinere , quae magis quaestiones praestant , quam aedificationem (1. ad Timot. cap. 1. v. 4.) Dei , quae est in fide . Hinc theologica eorum opera vel catecheses sunt , vel homiliae , vel sermones , vel Epistolae . Si quid itaque difficile , & arduum , spinosumque apud illos invenitur , illud profecto dici debet , quod contra Haereses scribere . Hoc in capite principes fuisse Ignatius contra Simonem , Menandrum , & Ebbionem ; Irenaeus contra Valentinum , & universam Gnosticorum Sobolem ; Tertullianus contra Marcionem ; Cyprianus , & Pacianus Barcinonensis in Novatianos ; Athanasius , Hilarius Pictaviensis , Ambrosius , & Augustinus contra Arianos ; Basilius Magnus , atque Gregorius Nazianzenus in Eunomianos ; Optatus & Augustinus contra Donatistas ; Theophilus Alexandrinus in Origenem ; Hieronymus contra Jovinianum , Helvidium , Vigilantium , & Pelagium ; Titus Boresius , & Augustinus contra Manichaeos ; idem Augustinus contra Joviniani , & Pelagii Sectarios ; Cyrillus Alexandrinus contra Nestorium ; Leo Papa adversus eundem Nestorium , Eutychetem , & Priscillianistas ; Sophronius Hierosolymitanus , & Divus Maximus contra Monothelitas ; Joannes Damascenus , & Theodorus Studita contra Iconomachos ; Divus Anselmus contra Graecos ; ac Divus Bernardus contra suae aetatis Haereticos .

In his enim Patrum scriptis scholastica quaedam elucet , seu , ut melius dicam , ratiocinandi methodus , quae cum recentiori scholastica , sive argumentandi ratione , nequaquam pugnat . Nihil tamen fecius vel invehendae novitatis amore ducti , vel inventis rebus nonnihil addendi cupidi alterius aetatis scholastici , quam animadverterent multa in antiquis Patribus confusa , neque , ut par erat , distincta , quo illa in aptum adducerent ordinem , cogitarunt Theologiam per articulos , variis sub titulis distributam , ad suprema quaedam capita revocare , ut multa illa ,

mo Saracenis Orientem vastantibus, Europamque invadentibus Gothis, Ostrogothis, Vandalisque, illa penitus interdicta. Putabant enim stolidissima haec capita, disciplinarum studio hominum ingenia frangi, & ad otium inclinari: Eaque erat inprimis egregiae fortitudinis commendatio, si quis ne scribendi quidem artem tota vita didicisset. Ad Ecclesiam tamquam ad Asylum confugerant pulsae undique litterae, jamque obtinuerat consuetudo

illa, & lauta divitiarum suppellex, quae incomposita nullius ferme utilitatis erat, prodesse omnibus in ordinem digesta; quum ordo cognitionum omnium, atque scientiarum fons sit, & origo.

Seculo septimo Tayonus Episcopus Caesar-Augustinus summam Theologiae ex operibus Sanctorum Gregorii Papae, & Augustini collectam elucubravit. Consequenti seculo Joannes Damascenus, qui majori ornatus ingenio, & multa lectione instructus, opus consecit uno volumine comprehensum, sub titulo *De Fide Orthodoxa*, eruditione, atque doctrina cumulatus: Illud autem in quatuor libros tribuit; quorum primus disserit de *Deo ejusque essentia, atque Atributis*; alter de *Creatione Mundi*, & de *Prædestinatione*, tertius autem, & quartus de *Mysteriis Trinitatis*, & *Incarnationis*, paucis de resurrectione mortuorum adjectis.

Novum istud inventum illustres fecit aditus recentiori scholasticae, quae tamen apud Latinos undecimo solum seculo exeunte lucem adpexit, auctore Divo Anselmo, qui de dogmatis fidei scribere suscepit. Quod enim nonnullis placet, ejus originem petendam a Lantfranco Anselmi Magistro, omni veri specie caret: siquidem ex operibus ejusdem Lantfranci, quae supersunt, judicandum sit. Opera vero Divi Anselmi eo, quo disposuit ordine P. Gerberon Congregationis S. Mauri, amplissimum Theologiae corpus constituunt, quo hodiernis etiam temporibus sapientissimi scholastici, tamquam fundamento uti non dubitant.

Seculo autem proxime inferiori Petrus Lombardus Parisiensis Antistes, Ecclesiae suae Pastor, unaque Doctor Theologus (quales omnes esse deceret Episcopos, si antiquitatis jura servarentur) in quatuor libros, secundum Petri Abaelardi methodum, Theologiam ex scripturis sanctis, & Patribus, ac praesertim Augustino desumptam edidit, quod magnum illi praeclarissimumque Magistri sententiarum nomen comparavit. Non ea erat Petro mens, ut veterem eliminaret scholasticam, cum illa veluti fundamento operis sui uteretur; neque ut novam ab ea prorsus alienam induceret; sed hoc unum sibi proposuit, quod & perfecit, nimirum aptiorem veteri Theologiae formam praebere, & studiosorum ingenia certo quodam ordine moderari, cui inhaerentes non aberrarent in scientia Dogmatum, quae apud antiquos Patres obscura erat, atque involuta.

Paullo ante Petrum Lombardum Hugo Victorinus idem opus conficiendum suscepit; verum Hugone, atque Abaelardo sapientior Petrus, vel felicius communi omnium consensu palmam retulit: plerique enim scho-

tudo ad meliorem usque aetatem sermone , scriptisque usurpata , ut Litterati quicumque essent , Clerici adpellarentur . Sed ibi quoque quam praepostere , quam inexter acceptae ! cum argumento conficit non uno , & Clericos bene multos , & Praesbyteros quoque , addo etiam , quod calamitosissimum est , Episcopos aliquos ne scribendi quidem artem tenuisse .

In ea temporum conditione , qua in Europa damnatae sunt litterae , non sine praesentissima Divini Numinis ope Carolus cognomento Magnus surrexit , qui literis instaurandis curam , patrociniumque indulgit . Qua de re , illo rerum potente , multae societates litterariae
cogi

scholastici ejus sententias vel sequi , vel commentari magna contentione aggressi sunt , adeo ut sacris exceptis Bibliis , nullus sit fere liber majori , quam opera Lombardi , commentariorum numero illustratus . Ea ratione scholastica disciplina , quae primo in quarundam sententiarum ex scripturis , & Patribus selectarum compositione sita erat , brevi Theologorum annotationibus magnopere excrevit , junctaque Dialectica & Metaphysica Aristotelis , novam omnino formam induit .

Opus absolvit D. Thomas Alberti Magni discipulus , atque quod alii tremula veluti manu adumbrarant , fortiter ipse , strenueque perfecit . Post multas disputationes , annotationes , & scripta , doctissimus iste scholasticus *Summam* elucubrare coepit , quae omnium ejus Scriptorum Epitome , opus omnium perfectissimum est , & mira ingenii vi elaboratum , supra quam post inventum in scholas Aristotelem , visum unquam fuerit .

Verum cum ea sit infelicissima rerum omnium conditio , ut vix ad summum perductae , statim relabantur , scholastica principio tam laudabilis in turpissimam cavillationem , scholarum christianarum majestate prorsus indignam , turpiter abiit . Melchior Canus in opere aureo de locis Theologicis hocce infortunium miro prorsus modo conqueritur ; neque vero dubitat dicere , *Cacodaemonis arte factum esse , ut scholastici Sacrae Scripturae , & Sanctis Patribus valedicentes , nec nisi vanas fustilesque subtilitates , ex disputandi prurigne subortas , inepte consuecantes contra Haereticos in arenam descenderint , non ancipiti gladio , quem tantopere commendat Apostolus , sed puerilibus arundinum armis instructi* . Laudabilem quidem esse futeur ad Theologiae expositionem uti philosophia ; verum illud religiose cavendum monet , ne theologia undique Peripatetica humanae tantum rationi subnixa in scholas intrudatur . Nonnullos , eosque non paucos esse pseudo-scholasticos ingenue fatendum ; sed & sunt quamplures germani summaque laude digni , Petavius scilicet , Thomassinus , Contensonius , Juvenin , Boucat , Tournely , Witrassé , Serry , & alii , quibus detrachere non sine maxima rationis injuria poteris . Hactenus de ortu , & fortuna theologiae scholasticae .

cogi coeperunt; nimirum Parisiensis, Tolosana, Oxoniensis, Ticinensis, Bononiensis, Onobrugensis; quibus dirigendis, erudiendisque Divi Benedicti Monachos, quos illa aetas solos doctiores habebat, accivit.

Illud autem observatione dignum videtur, quod seculo decimo denuo incitiae tenebris offusa Europa contabuit. Omnia enim luxata, turpia, pudenda: pauci scriptores eruditi; nulla Concilia memoratu digna. Unde infelix, & obscurum seculum decimum vulgo audit, fatente, ac dolente ipso Baronio, qui ait: *Novum inchoatur seculum, quod sui asperitate, ac boni sterilitate ferreum, malique exundantis deformitate plumbeum, atque inopia scriptorum adpellari consuevit obscurum.*

Parisiensis dumtaxat Academia Philosophis, Theologisque clarissimis tunc temporis florebat. Ibi namque Anselmum Laudunensem, Guilielmum Campellensem, Petrum Abaelardum, Gilbertum Porretanum, & Petrum Lombardum, antonomastice sententiarum Magistrum, docuisse scimus.

Eodem ferme seculo, undecimo scilicet labente, Salerni Medicinae Collegium, & Neapoli Theologiae per Rogerium Regem institutum validissimis momentis Franciscus Vargas Macchiucca Aequus Hierosolymitanus singulari doctrina, nobilitateque clarissimus in sua adversus praetensa Mendicantium ordinum jura dissertatione, pulchre, graphiceque ostendit.

Jaeta cum essent, Auditores praestantissimi, Collegii fundamenta, ingens in eo doctorum hominum copia, qui sacras litteras sanie, situque obsitas in bonam lucem vindicarunt. Quid enim non emolumenti viri illi Collegii nostri lumina, fidei, morumque conservationi contulerunt? Quid non fidei puritati, ne ab haeresi debacchante foedaretur praestiterunt? Quid non litteris hac in alma Neapolis urbe instaurandis, colendis, promovendis egerunt? sed quid cetera in ordinis hujus laudem commemorem? Reges ipsi Rogerii successores Ladislaus,

Fri-

Fridericus II. locupletissimi testes suis diplomatibus, indultisque existunt, quæ amplissimis exornatum privilegiis Collegium voluere. Atque Alphonsus ad Collegii dignitatem augendam, addendaque acuta ad virtutem calcaria, Vicemagno Cancellario, quod munus primum est, sceptrum, coronamque cum libro aperto pro sternate concessit, omnesque indiscriminatim Cappellani, familiarisque Regis titulo gaudere iussit. Neque solum Cæsares, Regesque, verum Pontifices quoque, quasi cum ipsis contendisse visi in ornandis Academiae Doctoribus, dum insignia sunt ea elargiti, quibus modo videmur induti.

Nolo tandem Collegii fata narrando persequi: unum reticere non licet, integra nimirum effluxisse secula, in quibus majorum gloriam cineribus obduxerunt laureati Doctores. Non sane id accidit, quod magna viris illis ingenia defuerint; sed quod vel illa solum litterarum studia in pretio fuerint, in quibus obstupescit ingenium; vel quod legibus desuetudine abrogatis, illud pristinum Collegii decus sensim sine sensu occubuit.

Mansisset fortassis eodem fato Collegium, mansissentque eodem loco sacrae, venerandaeque litterae, nisi excelsiores auctoritatis viri heroico ausu positos prava consuetudine limites, perfringere decrevissent. Magnum Regni Cancellarium Abellinatum Principem hic primum appello, virum auctoritate, meritisque vere magnum: Ille praestanti animi constantia pristinam Collegii formam induxit: ille novam intulit lucem: ille viam praeivit, & munivit: ille exemplo offendit, suas promovente rationes Angelo Cavalcante virtute, nobilitateque Viro clarissimo, sibi quemlibet ex Collegio ad Vicemagni Cancellarii munus deberi jus deligendi. Marchionem Nicolaum Fraggianni secundo loco ponam, nullo unquam labore exhaustiendum, sagacitate lynceum, qui ad vindicandum servitute Collegium, suppetias ferre non destitit. Quid non denique laudis Sanctae Clarae Aula meretur, dum posito litium fine, Collegium libertati restituit? Ei namque, quæ jura legesque pro Colle-

gii regimine condidit laus omnis exolvenda , ob id maxime , quod illam inter ceteras legem , de habendis semel in Mense theologicis dissertationibus , poni cogitavit ; quod certe ipsi solidam , ac perennem , nullisque vicibus intermorituram gloriam pariet . Ita enim fiet , ut postliminio theologiae Collegium ad suum nitorem redeat . Quae quidem Academia Urbem hanc nostram coelo , situ , deliciisque Italiae ceteris praestantior , reliquis pariter beatior , felicioremque reddet . Nec sane Civitas ulla felix unquam erit , si eruditione , si artium insignium , ac scientiarum lumine fuerit destituta .

Verum quid Academia Theologiae sit ; quae curae ; qui usus dicendum superest . Denotamus eo nomine Collegium , quod divisa inter plures , sed communi consilio agentes , opera , perficiendis , & adplicandis ad usum sacris scientiis seriam , constantemque curam impendit . Mirum sane , quod mitissimi Dei , Optimi , Maximi pietate factum , qui humani generis acumnas , ac barbariem , sub qua omnis plane marcebat orbis , misertus , ad sordes detergendas , illam indidit mentem , ut per Europam totam excitarentur Collegia . Quot enim Italia nostra , ingeniorum sublimium mater , & cultrix vel amoenis , & philologicis , vel severioribus studiis addictas jaecat Academias ? Quid quod Neapolis ipsa nostra alere , fovere , ac in dies augere Academias semper studuit ? Memoratu dignas hic reor Spinellianam selectis vivis compositam , quae & assidue librorum , machinarumque copia praesto est . Alteram Ecclesiasticarum rerum , cui Eminentissimus Cardinalis Archiepiscopus Spinelli Protector praest in Aedibus Patrum Congregationis Oratorii . Mittam ceteras , quae privatis dumtaxat auspiciis coluntur , ac foventur . Quae omnes Academiae communi agentes opera scientias excolunt . Longe autem majori jure Collegium nostrum scientiis sacris consecratum , id pro munere exequi debet , cogiturque . Ipsi enim singuli nonnisi communi adnitentes consilio sacras scientias excolimus . Unus namque

que omnibus non sufficit ; & infinitus rerum scibilibus cumulus , earumque diversitas omnem opprimit conatum . *Postere id indivisum hominis vulgaris studium* , ait cl. Fontanellus , *si quis unam in universo suo ambitu philosophiae disciplinam adgredi ausit* . Quid de Theologia dicendum , cui partes sunt innumerae , iisque subsidia propemodum infinita e diversissimarum rerum inquisitione arcessenda ? Sic sumus , & una illa humanae infirmitatis defectibus medela succurrit , ut divisis inter plures negotiis , quibus unus par nunquam fuisset , plures feliciter sufficiant . Quae aliarum facultatum , eadem , & forte major Sanctarum Litterarum ratio , quae pro dignitate tractari non poterunt , nisi earum unam sibi quisque partem expendendam decernat , illudque sumat onus , cui ferendo habiles prius humeros sibi adesse tentaverit . Hinc Collegia publico bono excogitata , & subinde enata , ut plures omni semper tempore , & ad omnes quaecumque sese res offerrent parati fortesque , qui promptum apponerent auxilium , adessent propugnatores . Major est in universis non solum , sed etiam in singulis doctrinarum generibus rerum copia , quam ut iniri numerum liceat : Nec mortalium ullus paucis illis , quos vivere datur , annis vel unam penitus exhauserit disciplinam . Nihil hic nimium loquor . Quod naturae opus aliquod microscopio intuentibus , idem scientias inquirentibus accidit omnino . Objice visui etiam acuto foliolum arbore decerptum , brevi temporis interstitio videberis tibi omnia pervidisse : adhibe vulgare quodlibet microscopium , videbis nova , & qualia non expectasses : substitue priori melius , eandemque saepius repete scenam , occurrent subinde plura non ante observata , quaeque non spem , sed omnino fiduciam pariant ; si melioribus uti vel oculis , vel engyscopiis liceret , plura porro obtutui tuo nova sese successive exhibitura . Eadem prorsus scientias excolentibus , cum sagacius secundas , ulterioresque ingeminant curas , eveniunt : prout enim objecta considerationi suae expo-

sita propius intuentur, & penitius, ita plura subinde pervident, & subtiliora; tantumque abest, ut vel sperare liceat posse nos tandem ad omnium rerum terminos investigando pertingere, ut in plurimis certum sit, numquam industriae humanae defuturum quod inveniat.

Falluntur profecto, & destinationum quandam pauperiem produnt, qui rerum fines illico, & fastigia loquantur, cum magnum aliquid, & difficile fieri feliciter conspiciant. Non ego unquam hominum unum usque eo laudaverim, ut quaecumque in scientiis inveniri possint, perfecisse illum dicam; at hoc modo dixerim, plurima illum tentasse, & cum multo plura supersint, ostendisse aliis qua ultra pergendum, & ut suis vestigiis insisterent, providisse.

Ex his emergit, quod scientiae, ut feliciter in majus provehantur, duo omnino requirant, societatem scilicet, divisamque inter plures operam, & insuper commune consilium. Quod alibi prospere in Europa factum scimus, hoc nobis imitandum est. Quid non incrementi physicis scientiis praestiterit Academia scientiarum in Gallia? Quid morali theologiae salmaticensis in Hispania? Quid mathefi Londinensis in Anglia? Quid denique philologiae Florentina in Italia? Nos autem etsi iis in scientiis occupamur, quas humano expendere ingenio non decet, cum aliis illae fontibus scateant; nihilo tamen secius illas excolere, probeque nosse, ac necessarios in usus advocare, nobis libere datum est. Perfici theologia jamdudum, & nunc etiam postulat. Quid enim ad mentem rectam efformandam; ad ingenium vera sapientia imbuendum; quid ad divina mysteria intime penetranda, ad Dei leges, Fidei dogmata, universamque Evangelii aeternam, & Ecclesiae disciplinam addiscendam, tot tricae, tot ambages, tot cavillationes, immensaque illa futilium, & inanium disputationum turba, quae ingenia miserrime torquent, & opprimunt? Equidem haud negaverim plures theologiae studiis labores impendere, qui

qui magnam litteris, & Ecclesiae operam navant, suisque lucubrationibus immortalī gloria dignissimis, multorum nugas compensant: at non pauci inveniuntur, qui de divinitate altercando, quaestionibus vel omnino abstractis, vel mere speculativis, & hypotheticis, nihilque ad fidei dogmata, Religionemque spectantibus, arguantur. Ad haec quis jure non exclamaret: proh dolor! Quae tanta temporis jactura! Quae ingeniorum dira perniciēs! Quae vana hominum occupatio! Nonne isthaec penitus ignorasse longe melius foret, quam utcumque sapere? Hinc enim exitium quoddam ortum est pulcherrimae facultatis, in qua potissimum excellere creduntur non qui gravissima ad cognoscendum, sed qui subtilissima ad fallendum excogitant. Hinc otiosae disputationes, quae mentem a sanctorum Bibliorum doctrina, a Patrum dictis, Conciliorumque decretis longissime abducunt, & sine ulla utilitate fatigant. Hinc pertinax, & insanum partium studium, quo fit, ut acerrime decertemus, cum minime oportet; idque viribus omnibus propugnemus, non quod veritati proxime accedit, sed quod iis placet, quorum institutum amplexi sumus. Grave est, quod dico, Patres ornatissimi, grave est, & nihil reprehendendi causa dico. Neque is ego sum, qui nodum in scirpo quaeritem, aut novitatis prurigine tactus, vetustiores Theologos parvipendere audeam; sed in iis juxta eruditissimorum virorum Melchioris Cani, Petaviique, atque illuminatae aetatis nostrae clariorum hominum sententiam, & rationem, moderandam methodum exoptarem.

Vobis itaque, Academici, quibus Theologia credita; vobis, inquam, incumbit, eruditione theologiam ornare, & quicquid subsidii, quod ab exoticarum linguarum peritia succrescit, adnectere, & Christi veram Religionem in A catholicos vindicare. Ad vos enim Petri monitum summo jure dirigitur, ut omni poscenti de ea, quae est in nobis, spe rationem reddatur. Ad vos, qui hujus sacrae facultatis Doctores estis, veluti ad ly-
dium

dium lapidem Regni nostri fides revocanda . Vos denique decet eam a latrantium Deistarum , Indifferentiumque turba tueri , ac omnium primi proprium ad usum Theologiam addicere , ad ejusque praecepta vitam , moresque instituere . Ceterarum professores artium si in vicio sint , sibi nocent , aliis vero vel nihil prorsus , vel parum : at Theologus si pravus sit , animum laedit , quae pars una est in homine excellentissima , Religionem , pietatem , Dei cultum non a se uno distrahit , non a singulis hominibus eximit , sed a Civitatibus , & Provinciis evellit , ejicit , exturbat . Hinc seditiones per omnem aetatem consequutae , bella civilia , caedes , incendia , rerum publicarum mutationes , & si quid calamitosius humanae societati contingere potest . Testis mihi Germania sit , Helvetia , Gallia ipsa , quae quamvis ad hanc diem singulari providentia ab Haereticorum insidiis fuerit erepta ; identidem tamen a suis Theologis multo graviora , quam ab externis hostibus passa est . Quae cum ita sint , intelligere dignemini , Auditores , non me theologis rem utilem commendare , sed plane necessariam , ut si nolint innocenter , integreque vivere , theologiae lauream omnino abjiciant .

Ad vos demum , Academici , quibus nihil esse debet charius ista , quam profiteri , facultate , quae vera sapientia est , animorumque dominatrix , mea convertitur oratio . Itaque si qua pietas , si qua indoles generosa , si quis amor publicae salutis , atque incolumitatis , date imbuendum his litteris , quibus itur ad apicem sapientiae : date Majoribus vestris , qui vobis praeluxerunt ad maxima . Poscit hoc fides catholica : Poscit hoc Patria , fortunis , ac vita potior : Poscit hic confessus , augustusque Senatus a Regibus institutus , ut Italiam omnem , ut hanc Urbem a sectarum perniciie liberam , tutamque servetis , ut ignem hostilem , ut ferrum , ut caedes a vobis , a Templis , ac delubris , monumentisque majorum arceatis .

At

At quo longius, quam decebat, aberravit oratio nostra, cum in laudibus potius, & gratiis nostrae Academiae Statori exolvendis immoratura erat? Etenim si praecipua, si maxima est omnes inter scientias Theologia; maximae profecto laudes Carolo Regi nostro, huius Academiae, quae tam insignem facultatem proficitur, auctori debentur. Carolus Rex noster Academiae Protector ac Princeps! quam hoc dulce sonat. Dulce vobis neapolitanae gentis Proceres! Dulce nobis amicissimi Collegae! Dulce juventuti, & posteris! Dulce litteris.

Quid dico? Caroli Protectoris nomen, virtutum epitome, quis sine admiratione audit? quis enunciat sine deliciis? quis illum animi omnia complectentis ambitum? quis illam consilii omnia prospicientis vim? quis ipsam auctoritatis omnia perficientis dignitatem? quis agendi dexteritatem? quis felicitatem successuum potest sine plo in augustum Regem affectu cogitare?

Equidem, Auditores optimi, non id mihi datum intelligo, ut quando pietatem Academiae in Statorem suum offendere, & in illius virtutes intueri audeo, enumeratis Regis ipsius animi factis, elogium vitae condere adgrediar. Plurima sunt, quae illud mihi institutum dissuadent. Omnia enarrare salutariter, magnifice, & feliciter gesta hominis non est praesertim rudis, & in dicendo parum exercitati. Scio, neminem posse eloquio suo ad facti dignitatem accedere. Erunt aliquando tamen et ex nostris aliqui, qui minus illam laudando obfurent.

Hinc paucissima attingam, neque eo illa modo, quo fieri passim solet. Renuncio artibus Rhetorum microscopicis, & colores objecto alienos saepe inducentibus. Renuncio licentiae, qua laudari etiam Principes aliquando solent, dicendo non quales sint, sed quales esse debuerint, ut Xenophon in Cyro. Contemno artificiola, quibus comparari alteris minutioribus solet Orationis panyricae Heros, ut additis aliorum umbris, subobscura
etiam

etiam ipsius gesta reddantur illustriora. Possset, fateor ; & sine aliorum injuria , Carolus Rex notiter praecipuis antiqui temporis Heroibus secum collatis omnino anteferri : magnificentius aut illud est , posse nulla aliorum ratione habita , sola gestorum suorum mentione facta , celebrari.

Quid igitur Auditores , quid , remotis istis , dici tandem debeat ? Habemus Regem , quibuscumque illum modis intueare , magnum . Oportet Regem esse & Carolo similem , si quis animo concipere concentum illum velit , quo diversissimae imperandi artes in eo conspirant . Oportet nosse , quibus illae modis acquisitae , auctae , & perfectae sint , si quis intelligere illarum dignitatem velit . Oportet summa consiliorum prudentia , experientia ratiociniis parta , & difficultatibus exercita polleat ; interfueritque consiliis , mediis , ac successibus , quicumque justum in deliberando Caroli sagacitati pretium statuere velit . Senatorum Regni , & Senatorii Ordinis virorum haec gloria est , quod tanta ipsi prudentiae suae specimina serenissimo Regi adprobaverint , ut ad audienda vicissim , & pensitanda ipsius consilia selecti , & admissi sint . Oportet denique magnum belli Ducem de gestorum serie plenius esse instructum , si quis bellicam Caroli fortitudinem , animum , prudentiam , labores , Solertiam obtutui sistere suo velit .

Id vestrum est excelsi animi probatae virtutis , & immortalis gloriae Viri milites Duces , Caroli Regis Legati . Vestrum est statuere , quis in Cives amor ad optandum , quae industria ad dicendum ; quae prudentia ad legitime incipiendum , quae auctoritas ad provehendum , quae ad docendum dexteritas , quae felicitas ad perficiendum illud pertineat , quod Carolus Auctor , vobis administris , per gentem neapolitanam praestitit , extensis maritima commoditate , per omnem terrarum orbem commerciis .

Solonem celeberrimum Atticae Civitatis Legislatorem

rem accepimus, quaesitum, an optimas Civibus suis leges dedisset? Optimas respondisse, ex iis, quas illi accepturi fuissent. Magnifica haec legum laus est, sed limitata tamen; quaeque arguit, aut Legislatorem, et si prudentem imperio, aut populum fide destitutum esse. Dicite vos iustitiae arbitri, (namque hoc vestrum est non advenae) dicite quantum hic infra Caroli factum Solonis prudentia, & auctoritas substituerint, quantum neapolitanae gentis, & obsequiositas, & nata inde felicitas atticam illam superaverint.

Expone consilii status excellentissima Synodus quae Caroli Regis circa sacra etiam negotia prudens advertit? Quod in promovendas sanctiores litteras studium? Quis pro scholis publicis sub omnigenae eruditionis viri Archiepiscopi Thessalonicensis Regii Sacelli Praefulis cura, erigendis, instaurandisque ardor? Quae animi regii in parandis pro bono publico bibliothecis, aedificiis ampliandis, Professoribus deligendis sollicitudo?

Non dicam plura Auditores; proveherer in altum mare, si aut haec diffusius edisserere, aut infinita, quae supersunt, alia, vel strictim adjungere conarer. Igitur me, unde sum egressus, recipiam: Habet Academia nostra, quo celebris & felix prae ceteris exultet, habet, inquam, Carolum Regem Statorem, & Protectorem; habet ut Parisiensis, & Taurinensis, quem colere, & venerari possit. Illud ad praefatis Academiis invidiam creandam superest, ut Rex noster Collegii amantissimus Restaurator, ea Doctoribus, & Magistris, Decano, & Vicemagno Cancellario privilegia confirmet, habeatque rata, quae decessores Reges pro Urbis, Regniq; bono benigno animo indulserunt.

Non morabor vos ultra, Auditores optimi, dum enarratis in Europa nostrum ad usque Collegium litterarum fatis, Academiae hujus Theologiae indole expensa, ejusdemque Auctorum gloria indicata, fidem jam liberasse arbitror, votis, & precibus absolvenda est Ora-

D

tio.

tio. Deus bonorum omnium auctor, & dator, qui cum unigenito Filio, & Spiritu Sancto Trinus, sapientia vero, bonitate, voluntate, atque omnipotentia unus es, & indivisus, qui omnem doctrinam, omnemque scientiam humanis mentibus immisisti: Te, ego, Deus omnium nostrum votis oro, obtestorque, ut quandiu homines vis in hoc mundo vivere, tandiu inter eosdem sapientiae, & doctrinae studia tuearis, ac serves. Redde Pater Regno nostro quae merentibus ita peccatis nostris, diu illi bona denegasti, ac reducto in vaginam infesto irae tuae gladio, pacem, qua nunc laetamur, adauge, simulque tanto muneri diuturnitatem adjunge. Serva Carolum Regem nostrum, cujus auspiciis haec Academia est instituta. Serva Reginam nostram Mariam Amaliam, cum Serenissima Infantium familia, cui adjice annos usque in diem generationis, & generationis. Denique Collegium quoque nostrum, cujus post tot damna, & naufragia tabulas colligere coepimus, respice clementiore oculo. Liceat nobis, qui in hoc theologico ordine excubamus pro salute publica, quique tam Sancto muneri sese imposterum dicabunt, sub alis tuis tranquille degere, litterarumque bonorum omnium praesidium, promovere. Imple etiam spiritu tuo omnium nostrum animos, ut relictis hujus mundi inanitatibus, tibi soli vivamus; & ad nominis tui gloriam, Reique publicae emolumentum, omne studium nostrum, omnesque denique conatus nostros unice dirigere clementer largire.

Dicebam.





Gaultier Sculp.